



【传忠书局刊刻】

曾文正公全集

曾国藩 著

李瀚章 编撰 李鸿章 校刊

〔第八卷〕

首卷·年谱·求阙斋日记类钞·家书

线装书局

版权页

图书在版编目（CIP）数据

曾文正公全集：全 12 册 / （清）曾国藩著；李瀚章编撰．—北京：线装书局，2012.1

ISBN 978-7-5120-0454-2

I.①曾… II.①曾… ②李… III.①曾国藩（1811～1872）—全集

IV.①Z425.2

中国版本图书馆 CIP 数据核字（2011）第 259875 号

曾文正公全集

作者：曾国藩

编撰：李瀚章

校刊：李鸿章

责任编辑：杜语 高晓彬 李津红

装帧设计：高欣彭彭

出版发行：线装书局

地址：北京市西城区鼓楼西大街 41 号（100009）

电话：010-64045283 64041012

网址：www.xzhbc.com

经销：新华书店

印刷：北京楠萍印刷有限公司

开本：787×1092 1/16

印张：334.75

字数：6800 千字

版次：2012 年 1 月第 1 版 2012 年 1 月第 1 次印刷

印数：1-3000

书号：ISBN 978-7-5120-0454-2

定价：680.00 元（全 12 册）

目 录

经史百家杂钞卷六	1
经史百家杂钞卷七	22
经史百家杂钞卷八	53
经史百家杂钞卷九	102
经史百家杂钞卷十	153
经史百家杂钞卷十一	193
经史百家杂钞卷十二	227
经史百家杂钞卷十三	259
经史百家杂钞卷十四	283
经史百家杂钞卷十五	315
经史百家杂钞卷十六	346
经史百家杂钞卷十七	387
经史百家杂钞卷十八	433

经史百家杂钞卷六

词赋之属下编一

诗 / 閟宫

閟宫有恤，实实枚枚；赫赫姜嫄，其德不回。上帝是依，无灾无
害，弥月不迟。是生后稷，降之百福。黍稷重穆，植稚菽麦，奄有下
国，俾民稼穡。有稷有黍，有稻有秬，奄有下土，缙禹之绪。首章十
七句

后稷之孙，实维大王，居岐之阳，实始翦商。至于文武，缙大王
之绪，致天之届，于牧之野；无贰无虞，上帝临女，敦商之旅。克咸
厥功，王曰“叔父，建尔元子，俾侯于鲁，大启尔宇，为周室辅！”
二章十七句

乃命鲁公，俾侯于东，锡之山川，土田附庸。周公之孙，庄公之
子，龙旂承祀，六轡耳耳。春秋匪解，享祀不忒，皇皇后帝，皇祖后
稷。享以驿牺，是飧是宜，降福既多，周公皇祖，亦其福女。三章十
七句

秋而载尝，夏而禴衡，白牡骍刚，牺尊将将。毛焦馘羹，笱豆大
房，万舞洋洋，孝孙有庆。俾尔炽而昌，俾尔寿而臧！保彼东方，鲁
邦是常！四章十二句

不亏不崩，不震不腾，三寿作朋，如冈如陵。公车千乘，朱英绿
縢，二矛重弓，公徒三万，贝冑朱。烝徒增增，戎狄是膺，荆舒是惩，
则莫我敢承！五章十

三句

俾尔昌而炽！俾尔寿而富！黄发台背，寿胥与试。俾尔昌而大！
俾尔耆而艾！万有千岁，眉寿无有害。六章八句

泰山岩岩，鲁邦所詹。奄有龟蒙，遂荒大东。至于海邦，淮夷来
同。莫不率从，鲁侯之功。七章八句

保有凫绎，遂荒徐宅。至于海邦，淮夷蛮貊。及彼南夷，莫不率
从。莫敢不诺，鲁侯是若。八章八句

天锡公纯嘏，眉寿保鲁，居常与许，复周公之宇。鲁侯燕喜，令妻寿母。宜大夫庶士，邦国是有。既多受祉，黄发儿齿。九章十句

徂来之松，新甫之柏，是断是度，是寻是尺。松栢有𡵓，路寝孔硕，新庙奕奕，奚斯所作。孔曼且硕，万民是若。十章十句

诗 / 长发

浚哲维商，长发其祥。洪水芒芒，禹敷下土方。外大国是疆，幅陨既长。有娥方将，帝立子生商。

玄王桓拨，受小国是达，受大国是达。率履不越，遂视既发。相土烈烈，海外有截。

帝命不违，至于汤齐。汤降不迟，圣敬日跻。昭假迟迟，上帝是祗，帝命式于九围。

受小球大球，为下国缀旒，何天之休！不竞不，不刚不柔，敷政优优，百禄是道。

受小共大共，为下国骏庞，何天之龙！敷奏其勇，不震不动，不不竦，百禄是总。

武王载旆，有虔秉钺，如火烈烈，则莫我敢曷。苞有三蘖，莫遂莫达；九有有截，韦顾既伐，昆吾夏桀。

昔在中叶，有震且业。允也天子，降于卿士。实维阿衡，实左右商王。

诗 / 抑

抑抑威仪，维德之隅。人亦有言，靡哲不愚。庶人之愚，亦职维疾；哲人之愚，亦维斯戾。

无竞维天，四方其训之；有觉德行，四国顺之。谟定命，远犹辰告，敬慎威仪，维民之则。

其在于今，兴迷乱于政，颠覆厥德，荒湛于酒。女虽湛乐从，弗念厥绍？罔敷求先王，克共明刑？

肆皇天弗尚，如彼泉流，无沦胥以亡？夙兴夜寐，洒扫廷内，维民之章；修尔车马，弓矢戎兵，用戒戎作，用遏蛮方。

质尔人民，谨尔侯度，用戒不虞；慎尔出话，敬尔威仪，无不柔嘉。白圭之玷，尚可磨也；斯言之玷，不可为也！

无易由言，无曰苟矣，莫扞朕舌，言不可逝矣。无言不讎，无德不报。惠于朋友，庶民小子，子孙绳绳，万民靡不承！

视尔友君子，辑柔尔颜，不遐有愆。相在尔室，尚不愧于屋漏；无曰不显，莫予云觐。神之格思，不可度思，矧可射思！

辟尔为德，俾臧俾嘉。淑慎尔止，不愆于仪，不僭不贼，鲜不为则。投我以桃，报之以李；彼童而角，实虹小子。

荏染柔木，言缙之丝；温温恭人，维德之基。其维哲人，告之话言，顺德之行；其维愚人，覆谓我僭，民各有心！

於乎小子，未知臧否。匪手携之，言示之事；匪面命之，言提其耳。借曰未知，亦既抱子。民之靡盬，谁夙知而莫成？

昊天孔昭，我生靡乐，视尔梦梦，我心惨惨。海尔谆谆，听我藐藐，匪用为教，覆用为虐。借曰未知，亦聿既髦！

於乎小子，告尔旧止，听用我谋，庶无大悔。天方艰难，曰丧厥国。取譬不远，昊天不弔。回遹其德，俾民大棘。

诗 / 宾之初筵

宾之初筵，左右秩秩，笾豆有楚，殽核维旅。酒既和旨，饮酒孔偕；钟鼓既设，举酬逸逸。大侯既抗，弓矢斯张。射夫既同，献尔发功。发彼有的，以祈尔爵。

笱舞笙鼓，乐既和奏，烝衍烈祖，以洽百礼。百礼既至，有壬有林，锡尔纯嘏，子孙其湛。其湛曰乐，各奏尔能，宾载手仇，室人入又。酌彼康爵，以奏尔时。

宾之初筵，温温其恭。其未醉止，威仪反反；曰既醉止，威仪幡幡。舍其坐迁，屡舞仙仙。其未醉止，威仪抑抑；曰既醉止，威仪怱怱。是曰既醉，不知其秩。

宾既醉止，载号载呶，乱我笾豆，屡舞僛僛。是曰既醉，不知其邮。侧弁其俄，屡舞傴傴。既醉而出，并受其福；醉而不出，是谓伐德。饮酒孔嘉，维其令仪。

凡此饮酒，或醉或否。既立之监，或佐之史，彼醉不臧，不醉反耻。式勿从谓，无俾大怠，匪言勿言，匪由勿语；由醉之言，俾出童羖。三爵不识，矧敢多又？

诗 / 敬之

敬之敬之，天维显思，命不易哉！无曰高高在上；陟降厥士，日监在兹。

维予小子，不聪敬止！日就月将，学有缉熙于光明；佛时仔肩，示我显德行。

诗 / 小毖

予其惩，而毖后患。莫予荍蜂，自求辛螫。肇允彼桃虫，拼飞维鸟。未堪家多难，予又集于蓼。

左传 / 虞箴

芒芒禹迹，画为九州，经启九道。民有寝庙，兽有茂草，各有攸处，德用不扰。在帝夷羿，冒于原兽，忘其国恤，而思其麇牡，武不可重，用不恢于夏家。兽臣司原，敢告仆夫！

李斯 / 峰山刻石

皇帝立国，维初在昔，嗣世称王。讨伐乱逆，威动四极，武义直方。戎臣奉诏，经时不久，灭六暴强。廿有六年，上荐高号，孝道显明。既献泰成，乃降敷惠，亲巡远方。登于峰山，群臣从者，咸思悠长。

追念乱世，分土建邦，以开争理。攻战日作，流血于野，自泰古始。世无万数，阡及五帝，莫能禁止。乃今皇帝，壹家天下，兵不复起。灾害减除，黔首康定，利泽长久。群臣诵略，刻此乐石，以著经纪。

李斯 / 泰山刻石

皇帝临位，作制明法，臣下修饬。二十有六年，初并天下，罔不宾服。亲巡远方黎民，登兹泰山，周览东极。从臣思迹，本原事业，祇诵功德。治道运行，诸产得宜，皆有法式。大义休明，垂于后世，顺承勿革。

皇帝躬圣，既平天下，不懈于治。夙兴夜寐，建设长利，专隆教诲。训经宣达，远近毕理，咸承圣志。贵贱分明，男女理顺，慎遵职事。昭隔内外，靡不清净，施于后嗣。化及无穷，遵奉遗诏，永承重戒。

李斯 / 琅邪台刻石

维二十六年，皇帝作始；端平法度，万国之纪。以明人事，合同父子；圣智仁义，显白道理。东抚东土，以省卒士；事已大毕，乃临于海。

皇帝之功，勤劳本事；上农除末，黔首是富。普天之下，抆心揖志；器械一量，同书文字。日月所照，舟舆所载，皆终其命，莫不得意。

应时动事，是维皇帝；匡饬异俗，陵水经地。忧恤黔首，朝夕不懈；除疑定法，咸知所辟。方伯分职，诸治经易；举错必当，莫不如画。

皇帝之明，临察四方。尊卑贵贱，不逾次行。奸邪不容，皆务贞良。细大尽力，莫敢怠荒。远迹辟隐，专务肃庄。端直敦忠，事业有常。

皇帝之德，存定四极。诛乱除害，兴利致福。节事以时，诸产繁殖。黔首安宁，不用兵革。六亲相保，终无寇贼。欢欣奉教，尽知法式。

六合之内，皇帝之土：西涉流沙，南尽北户，东有东海，北过大夏。人迹所至，无不臣者。功盖五帝，泽及牛马。莫不受德，各安其宇。

李斯 / 之罘刻石

维二十九年，时在中春，阳和方起。皇帝东游，巡登之罘，临照于海。从臣嘉观，原念休烈，追诵本始。大圣作治，建定法度，显著纲纪。外教诸侯，光施文惠，明以义理。六国回辟，贪戾无厌，虐杀不已。皇帝哀众，遂发讨师，奋扬武德。义诛信行，威旁达，莫不宾服。烹灭强暴，振救黔首，周定四极。普旋明法，经纬天下，永为仪

则。大矣哉！宇县之中，承顺圣意。群臣诵功，请刻于石，表垂于常式。

李斯 / 碣石刻石

遂兴师旅，诛戮无道，为逆灭息。武殄暴逆，文复无罪，庶心咸服。惠论功劳，赏及牛马，恩肥土域。皇帝奋威，德并诸侯，初一泰平。堕坏城郭，决通川防，夷去险阻。地势既定，黎庶无由，天下咸抚。男乐其畴，女修其业，事各有序。惠被诸产，久并来田，莫不安所。群臣诵烈，请刻此石，垂著仪矩。

李斯 / 会稽刻石

皇帝休烈，平一字内，德惠修长。三十有七年，亲巡天下，周览远方。遂登会稽，宣省习俗，黔首齐庄。群臣诵功，本原事迹，追道高明。秦圣临国，始定刑名，显陈旧章。初平法式，审别职任，以立恒常。六王专倍，贪戾傲猛，率众自强。暴虐恣行，负力而骄，数动甲兵。阴通间使，以事合从，行为辟方。内饰诈谋，外来侵边，遂起祸殃。义威诛之，殄熄暴悖，乱贼灭亡。圣德广密，六合之中，被泽无疆。

皇帝并宇，兼听万事，远近毕清。运理群物，考验事实，各载其名。贵贱并通，善否陈前，靡有隐情。饰省宣义，有子而嫁，倍死不贞。防隔内外，禁止淫佚，男女洁诚。夫为寄猓，杀之无罪，男秉义程。妻为逃嫁，子不得母，咸化廉清。大治濯俗，天下承风，蒙被休经。皆遵度轨，和安敦勉，莫不顺令。黔首修絜，人乐同则，嘉保太平。后敬奉法，常治无极，輿舟不倾。从臣诵烈，请刻此石，光垂休铭。

汉书 / 安世房中歌 依《汉书》刘敞注，分十七章

大孝备矣，休德昭清。高张四县，乐充宫廷。芬树羽林，云景杳冥。金支秀华，庶旒翠旌。

《七始》《华始》，肃唱和声。神来宴娱，庶几是听。以上四句，汲古阁入上章。粥粥音送，细齐人情。忽乘青玄，熙事备成。清思眈眈，经纬冥冥。

我定历数，人告其心。敕身齐戒，施教申申。乃立祖庙，敬明尊亲。大矣孝熙，四极爰！

王侯秉德，其邻翼翼。显明昭式，清明鬯矣。皇帝孝德，竟全大功，以上六句，汲古阁入上章。抚安四极。

海内有奸，纷乱东北。诏抚成师，武臣承德。行乐交逆，《箫》《勺》群慝。肃为济哉，盖定燕国。

大海荡荡水所归，高贤愉愉民所怀。大山崔，百卉殖；民何贵？贵有德。

安其所，乐终产；乐终产，世继绪。飞龙秋，游上天；高贤愉，乐民人。以上三章，汲古阁并为一章。

丰草萋，女罗施；善何如？谁能回！大莫大，成教德；长莫长，被无极。雷震震，电耀耀；明德乡，治本约。治本约，泽弘大，加被宠，咸相保。德施大，世曼寿。

都荔遂芳，宵窳桂华。孝奏天仪，若日月光。乘玄四龙，回驰北行。羽旄殷盛，芬哉芒芒。孝道随世，我署文章。——《桂华》

冯冯翼翼，承天之则。吾易久远，烛明四极。慈惠所爱，美若休德。杳杳冥冥，克绰永福。——《美芳》

磬磬即即，师象山则。呜呼孝哉！案抚戎国。蛮夷竭欢，象来致福。兼临是爱，终无兵革。

嘉荐芳矣，告灵飨矣。告灵既飨，德音孔臧。惟德之臧，建侯之常。承保天休，令问不忘！

皇皇鸿明，荡侯休德。嘉承天和，伊乐厥福。在乐不荒，惟民之则。

浚则师德，下民咸殖。令问在旧，孔容翼翼！

孔容之常，承帝之明。下民之乐，子孙保光。承顺温良，受帝之光。嘉荐令芳，寿考不忘！以上三章，汲古阁并为一章。

承帝明德，师象山则。云施称民，永受厥福。承容之常，承帝之明。下民安乐，受福无疆！

汉书 / 郊祀歌

练时日，侯有望，炳萧，延四方。九重开，灵之旂，垂惠恩，鸿祐休。灵之车，结玄云，驾飞龙，羽旄纷。灵之下，若风马，左仓龙，右白虎。灵之来，神哉沛，先以雨，殷裔裔。灵之至，庆阴阴，相放，震澹心。灵已坐，五音飭，虞至旦，承灵亿。牲茧栗，粢盛香，尊桂酒，宾八乡。灵安留，吟青黄，遍观此，眺瑶堂。众嫔并，绰奇丽，颜如荼，兆逐靡。被华文，厕雾縠，曳阿锡，佩珠玉。侠嘉夜，茝兰芳，澹容与，献嘉觞。《练时日》一。

帝临中坛，四方承宇，绳绳意变，备得其所。清和六合，制数以五，海内安宁，兴文偃武。后土富媪，昭明三光，穆穆优游，嘉服上黄。《帝临》二。

青阳开动，根荄以遂；膏润并爱，跛行毕逮。霆声发荣，处倾听；枯槁复产，乃成厥命。众庶熙熙，施及夭胎；群生嘒嘒，惟春之祺。《青阳》三。邹子乐。

朱明盛长，敷与万物；桐生茂豫，靡有所诎。敷华就实，既阜既昌；登成甫田，百鬼迪尝。广大建祀，肃雍不忘；神若宥之，传世无疆。《朱明》四。邹子乐。

西颢沆砀，秋气肃杀；含秀垂颖，续旧不废。奸伪不萌，祗孽伏息；隅辟越远，四貉咸服。既畏兹威，惟慕纯德；附而不骄，正心翊翊。《西颢》五。邹子乐。

玄冥陵阴，蛰虫盖藏，中木零落，抵冬降霜。易乱除邪，革正异俗，兆民反本，抱素怀朴。条理信义，望礼五岳，籍敛之时，掩收嘉谷。《玄冥》六。邹子乐。

惟泰元尊，媪神蕃厘，经纬天地，作成四时。精建日月，星辰度理，阴阳五行，周而复始。云风雷电，降甘露雨，百姓蕃滋，咸循厥绪。继统共勤，顺皇之德，鸾路龙鳞，罔不矜饰，嘉筵列陈，庶几宴享，灭除凶灾，烈腾八荒。钟鼓竽笙，云舞翔翔，招摇灵旗，九夷宾将。《惟泰元》七。建始元年，丞相匡衡奏罢鸾路龙鳞，更定诗曰“涓选休成”。

天地并况，惟予有慕，爰熙紫坛，思求厥路。恭承禋祀，缊豫为纷，黼绣周张，承神至尊。千童罗舞成八溢，合好效欢虞泰一。《九歌》毕奏斐然殊，鸣琴竽瑟会轩朱。璆磬金鼓，灵其有喜，百官济济，各敬厥事。盛牲实俎进闻膏，神奄留，临须臾。长丽前掞光耀明，寒暑不忒况皇章！展诗应律玉鸣，函宫吐角激徵清。发梁扬羽申以商，造兹新音永久长。声气远条凤鸟翔，神夕奄虞盖孔享。《天地》八。丞相匡衡奏罢黼绣周张，更定诗曰“肃若旧典”。

日出入安穷？时世不与人同。故春非我春，夏非我夏，秋非我秋，冬非我冬。泊如四海之池，遍观是邪谓何？吾知所乐，独乐六龙，六龙之调，使我心若，訾黄其何不徕下？《日出入》九。

太一况，天马下，沾赤汗，沫流赭。志倏飏，精权奇，浮云，暗上驰。体容与，逝万里，今安匹？龙为友。元狩三年，马生渥洼水中作。

天马徕，从西极，涉流沙，九夷服。天马徕，出泉水，虎脊两，化若鬼。天马徕，历无草，径千里，循东道。天马徕，执徐时，将摇举，谁与期？天马徕，开远门，竦予身，逝昆仑。天马徕，龙之媒，游阊阖，观玉台。《天马》十。太初四年诛宛王，获宛马作。

天门开，荡荡，穆并骋，以临飡。光夜烛，德信著，灵浸平而鸿，长生豫。大朱涂广，夷石为堂。饰玉梢以舞歌，体招摇若永望。星留俞，塞陨光，照紫幄，珠黄。幡比翅回集贰，双飞常羊。月穆穆以金波，日华耀以宣明。假清风轧忽，激长至重觞。神裴回，若留放，殪冀亲，以肆章。函蒙祉福常若期，寂渗上天知厥时。泛泛溟溟从高旂，殷勤此路肱所求。桃正嘉吉弘以昌，休嘉砰隐溢四方。专精厉意逝九阂，纷云六幕浮大海。《天门》十一。

景星显见，信星彪列，象载昭庭，日亲以察。参侔开阖，爰推本纪，汾脰出鼎，皇祐元始。五音六律，依韦飡昭，杂变并会，雅声远姚。空桑琴瑟结信成，四兴递代八风生，殷殷钟石羽籥鸣，河龙供鲤醇牺牲，百末旨酒布兰生，泰尊柘浆析朝醒。微感心攸通修名，周流

常羊思所并。穰穰复正直往宁，冯蠡切和疏写平。上天布施后土成，穰穰丰年四时荣。《景星》十二。五年得鼎汾阴作。

齐房产草，九茎连叶，宫童效异，披图案谍。玄气之精，回复此都，蔓蔓日茂，芝成灵华。《齐房》十三。元封二年芝生甘泉齐房作。

后皇嘉坛，立玄黄服，物发冀州，兆蒙祉福。沆沆四塞，遐狄合处，经营万亿，咸遂厥宇。《后皇》十四。

华烨烨，固灵根。神之旂，过天门，车千乘，敦昆仑。神之出，排玉房，周流杂，拔兰堂。神之行，旌容容，骑沓沓，般纵纵。神之休，泛翊翊，甘露降，庆云集。神之掄，临坛宇，九疑宾，夔龙舞。神安坐，翔吉时，共翊翊，合所思。神喜虞，申贰觞，福滂洋，迈延长。沛施祐，汾之阿，扬金光，横泰河。莽若云，增阳波，遍牖，腾天歌。《华烨烨》十五。

五神相，包四邻，土地广，扬浮云。挖嘉坛，椒兰芳，壁玉精，垂华光。益亿年，美始兴，交于神，若有承。广宣延，咸毕觞，灵輿位，偃蹇骧。卉汨牖，析奚遗？淫淥泽，汪然归。《五神》十六。

朝陇首，览西垠，雷电掣，获白麟。爰五止，显黄德，图匈奴，熏鬻殛。辟流离，抑不详，宾百僚，山河飧。掩回轅，鬣长驰，腾雨师，洒路陂。流星陨，感惟风，归云，抚怀心。《朝陇首》十七。元狩元年行幸雍，获白麟作。

象载瑜，白集西，食甘露，饮荣泉。赤雁集，六纷员，殊翁杂，五采文。神所见，施祉福，登蓬莱，结无极。《象载瑜》十八。太始三年行幸东海，获赤雁作。

赤蛟綏，黄华盖，露夜零，昼暗湫。百君礼，六龙位，勺椒浆，灵已醉。灵既享，锡吉祥，芒芒极，降嘉觞。灵殷殷，烂扬光，延寿命，永未央。杳冥冥，塞六合，泽汪，辑万国。灵襍襍，象輿，票然逝，旗透蛇。礼乐成，灵将归，托玄德，长无衰。《赤蛟》十九。

扬雄 / 十二州箴

冀州牧箴

洋洋冀州，鸿原大陆。岳阳是都，岛夷皮服。潺湲河流，夹以碣石。三后攸降，列为侯伯；降周之末，赵、魏是宅。冀州麋沸，炫沔如汤，更盛更衰，载纵载横。陪臣擅命，天王是替，赵、魏相反，秦拾其敝。北筑长城，恢夏之场，汉兴定制，改列藩王。仰览前世，厥力孔多，初安如山，后崩如崖。故治不忘乱，安不忘危。周宗自怙，云焉有予隳！六国奋矫，渠绝其维。牧臣司冀，敢告在阶。

扬州牧箴

矫矫扬州，江汉之浒，彭蠡既猪，阳鸟攸处。橘、柚、羽、贝，瑶、琨、筱、荡，闽越北垠，沅湘攸往。犷矣淮夷，蠢蠢荆蛮，翩彼昭王，南征不旋。人咸蹶于垤，莫蹶于山；咸跌于污，莫跌于川。明哲不云我昭，童蒙不云我昏；汤、武圣而师伊、吕，桀、纣悖而诛逢、干。盖迹不可不察，远不可不亲；靡有孝而逆父，罔有义而忘君。泰伯逊位，基吴绍类；夫差一误，泰伯无祚。周室不匡，勾践入霸。当周之隆，越裳重译；春秋之末，侯甸畔逆。元首不可不思，股肱不可不孳；尧崇屡省，舜盛钦谋。牧臣司扬，敢告执筹。

荆州牧箴

幽幽巫山，在荆之阳；江、汉朝宗，其流汤汤。夏君遭鸿，荆巫是调，云梦途泥，包匭菁茅，金玉砥砺，象齿元龟，贡篚百物，世世以饶。战战栗栗，至桀荒溢，曰“在帝位，若天有日，不顺庶国，孰敢予夺！”亦有成汤，果秉其钺，放之南巢，号之以桀。南巢茫茫，包楚与荆，风飘以悍，气锐以刚；有道后服，无道先强，世虽安平，无敢逸豫！牧臣司荆，敢告执御。

青州牧箴

茫茫青州，海岱是极；盐铁之地，铅松怪石。群水攸归，莱夷作牧；贡篚以时，莫怠莫违。昔在文、武，封吕于齐。厥土途泥，在丘之营，五侯九伯，是讨是征。马殆其衔，御失其度；周室荒乱，小白以霸。诸侯僉服，复尊京师；小白既没，周卒陵迟。嗟兹天王，附命下土，失其法度，丧其文武。牧臣司青，敢告执矩。

徐州牧箴

海岱伊淮，东海是渚；徐州之土，邑于海宇。大野既潏，有羽有蒙，孤桐嫔珠，泗沂攸同。实列藩蔽，侯卫东方，民好农蚕，大野以康。帝癸及辛，不祗不恪，沉湎于酒，而忘其东作。天命汤、武，剿绝其绪。祚降周任，姜镇于琅邪；姜氏绝苗，田氏攸都。事由细微，不虑不图，祸如丘山，本在萌芽。牧臣司徐，敢告仆夫。

兖州牧箴

悠悠济、河，兖州之宇，九河既道，雷夏攸处。草繇木条，漆、丝、纁；济、漯既通，降丘宅土。成汤五徙，卒都于亳；盘庚北渡，牧野是宅。丁感雉雉，祖己伊忠，爰正厥事，遂绪高宗。厥后陵迟，颠覆厥绪，西伯戡黎，祖伊奔走。致天威命，不恐不震，妇言是用，牝鸡是晨。三仁既知，武果戎殷，牧野之禽，岂复能耽！甲子之朝，岂复能笑！有国虽久，必畏天咎；有民虽长，必惧人殃。箕子歆歔，厥居为墟。牧臣司兖，敢告执书。

豫州牧箴

郁郁荆山，伊河是经；蒙播泉漆，惟用攸成。田田相拏，庐庐相距，夏、殷不都，成周攸处。豫野所居，爰在鹑墟，四隩咸宅，宇内莫如。陪臣执命，不虑不图，王室陵迟，丧其爪牙；靡哲靡圣，捐失其正，方伯不维，韩卒擅命。文、武孔纯，至厉作昏；成、康孔宁，至幽作倾。故有天下者，毋曰“我大，莫或余败”！毋曰“我强，靡克余亡”！夏宅九州，至于季世，放于南巢；成、康太平，降及周微，带敝屏营。屏营不起，施于孙子，王赧为极，实绝周祀。牧臣司豫，敢告柱史。

雍州牧箴

黑水西河，横截昆仑，邪指闾阖，画为雍垠，上侵积石，下碍龙门。自彼氐羌，莫敢不来庭，莫敢不来匡。每在季王，常失厥绪，侯纪不贡，荒侵其宇。陵迟衰微，秦据以戾，兴兵山东，六国颠沛。上帝不宁，命汉作京，陇山以徂，列为西荒。南排劲越，北启强胡，并连属国，一护攸都。盖安不忘危，盛不讳衰。牧臣司雍，敢告缀衣。

益州牧箴

岩岩岷山，古曰梁州，华阳西极，黑水南流。茫茫洪波，鯀堙降陆，于时八都，厥民不隩。禹导江、沱，岷、蟠启干，远近底贡，磬错罍丹。丝麻条畅，有梗有稻，自京徂畛，民攸温饱。帝有桀、纣，涵沉颇僻，遏绝苗民，灭夏殷绩。爰周受命，复古之常；幽、厉夷业，破绝为荒。秦作无道，三方溃叛；义兵征暴，遂国于汉。拓开疆宇，恢梁之野，列为十二，光羨虞、夏。牧臣司梁，是职是图，经营盛衰，敢告士夫。

幽州牧箴

荡荡平川，惟冀之别，北阨幽州，戎夏交逼。伊昔唐、虞，实为平陆，周末荐臻，迫于獯鬻。晋失其陪，周使不徂，六国擅权，燕、赵本都。东限貉，羨及东胡，强秦北排，蒙公城疆。大汉初定，介狄之荒，元戎屡征，如风之腾。义兵涉漠，偃我边明，既定且康，复古虞、唐。盛不可不图，衰不可或忘；堤溃蚁穴，器漏针芒。牧臣则幽，敢告侍旁。

并州牧箴

雍别朔方，河水悠悠，北辟獯鬻，南界泾流。画兹朔土，正直幽方。自昔何为，莫敢不来贡！莫敢不来王！周穆遐征，犬戎不享。爰貉伊德，侵玩上国，宣王命将，攘之泾北。宗周罔职，日用爽蹉，既不俎豆，又不干戈，犬戎作难，弊于骊阿。太上曜德，其次曜兵；德兵俱颠，靡不悴荒。牧臣司并，敢告执纲。

交州牧箴

交州荒裔，水与天际，越裳是南，荒国之外，爰自开辟，不羁不经。周公摄祚，白雉是献，昭王陵迟，周室是乱，越裳绝贡，荆楚逆叛。四国内侵，蚕食宗周，臻于季赧，遂入灭亡，大汉受命，中国兼该。南海之宇，圣武是恢，稍稍受羁，遂臻黄支，杭海三万，来牵其犀。盛不可不忧，隆不可不惧！顾瞻陵迟，而忘其规摹。亡国多逸豫，而存国多难；泉竭中虚，池竭濊干。牧臣司交，敢告执宪。

扬雄 / 赵充国颂

明灵惟宣，戎有先零；先零猖狂，侵汉西疆。汉命虎臣，惟后将军，整我六师，是讨是震。既临其域，谕以威德；有守矜功，谓之弗克。请奋其旅，于罕之羌，天子命我，从之鲜阳。营平守节，屡奏封章，料敌制胜，威谋靡亢。遂克西戎，还师于京，鬼方宾服，罔有不庭。昔周之宣，有方有虎，诗人歌功，乃列于《雅》。在汉中兴，充国作武，赳赳桓桓，亦绍厥后。

扬雄 / 酒箴

子犹瓶矣！观瓶之居，居井之眉，处高临深，动常近危。酒醪不入口，藏水满怀。不得左右，牵于徽。一旦专碍，为瓮所。身提黄泉，骨肉为泥。自用如此，不如鸱夷！鸱夷滑稽，腹大如壶。昼日盛酒，人复借酤。常为国器，托于属车。出入两宫，经营公家。由是言之，酒何过乎？

班固 / 封燕然山铭

惟永元元年秋七月，有汉元舅，曰车骑将军窦宪，寅亮圣皇，登翼王室，纳于大麓，惟清缉熙，乃与执金吾耿秉，述职巡御，治兵于朔方。鹰扬之校，螭虎之士，爰该六师，暨南单于，东胡乌桓，西戎氐羌，侯王君长之群，骁骑十万。元戎轻武，长毂四分，雷辎蔽路，万有三千余乘。勒以八阵，莅以威神，元甲耀日，朱旗绛天。遂凌高阙，下鸡鹿，经磧卤，绝大漠，斩温禺以衅鼓，血尸遂以染镠。然后四校横徂，星流彗扫，萧条万里，野无遗寇。

于是域灭区殫，反旆而旋，考传验图，穷览其山川。遂逾涿邪，跨安侯，乘燕然，蹶冒顿之区落，焚老上之龙庭。将上以摅高文之宿愤，光祖宗之元灵；下以安固后嗣，恢拓境宇，振大汉之天声。兹可谓一劳而久逸，暂费而永宁也。

乃遂封山刊石，昭铭盛德，其辞曰：铄王师兮征荒裔，剿凶虐兮截海外，夙其邈兮亘地界，封神丘兮建隆碣，熙帝载兮振万世。

班固 / 高祖泗水亭碑铭

皇皇圣汉，兆自沛丰，乾降著符，精感赤龙。承赧流裔，袭唐末风，寸天尺土，无埃斯亭，建号宣基，维以沛公。扬威斩蛇，金精摧